



Qitiusumik Inuit Nalunaarsorsimaffiat pillugu inatsisip allanngortinnissaanut Inatsisissamut, Kalaallit Nunaanni folketingimut qinersisarneq pillugu inatsimmut aamma Folketingimut qinersisarneq pillugu inatsisimmut siunnersuummi aalajangersakkat ilaat Kalaallit Nunaanni Namminersorlutik Oqartussat ilanngunnissaannut Inatsisartunut aalajangiiffigisassatut siunnersuut (Danmarkimi Kalaallillu Nunaanni inunnik Kalaallit Nunaanni Namminersorlutik Oqartussanit imaluunniit qallunaat naalagaaffiannit naalagaaffiup avataanut il. II. Aallartitaalluni peqqusaasimasunut kiisalu Danmarkimi Kalaallillu Nunaanni folketingimut qinersinermi allattorsimaffimmut ilanngunnissamut tunngatillugu najugaqarnermut nalunaarsortinneq)

(Naalakkersuisut Siulittaasuat)
(Siullermeerneqarnera)

Demokraatit Naalakkersuisut uuminnga siunnersuuteqarnerannut qutsavigaat, kalaallit aallartitat danskit aallartitaatulli naligiimmik atugaqartitaanissaannut tunngasoq.

Suminnganneerneq oqaluuserinngitsoorsinnaagunangilarput, tassungalu atatillugu kalaallit nunaanni innuttatut isigineqarnissamut aalajangiinissamut tunngavissat. Demokraatiniilli naqissuserusupparput Naalagaaffeqatigiikkallartilluta suut tamaasa atorlugit naqissusertassagatsigu, Naalagaaffeqatigiinneq Danmarkip iluarigaangagu aatsaat atuuttassanngitsoq kisiannili uagut kalaallit danskisullu innuttaassusillit assigiimmik pisinnaatitaaffeqqassasut.

Assersuutissarpassuaqarpoq periarfissat pisinnaatitaaffiilu assigiinnginnerannut, naak suliassat assigiikkaluartut, aamma ullutsinni. Politiit peqqinnissaqarfimmilu sulisut sulinerminni atugaat suli assigiinngitsuupput, tamakku qangali aqqereersimasariaqaraluartut. Taamaattumik una siunnersuut assersuutissaavoq, uagut Kalaallit Nunaannit suleqatigiinermik nukittunerusumik naligiinnerusumillu kissaateqartugut.

Allatut oqaatigalugu siunnersuut pitsassuuvoq, kalaallit nunaanni innuttaasut aallartitaasimasut taakkulu ilaqutaat pingaartumillu meeraat naligiimmik pisinnaatitaaffeqqarnissaasa qulakkeerneqarnissaannik siunertaqarmat, siunissami sumi Kalaallit Nunaannut attuumassuteqarnertik tunngavigalugu periarfissaqassasut pisortanit ikiorserneqarnissamik, tassani peqqinnissaqarfimmit ikiorneqarnissaq, ilinniagaqarnerisutit, piniarsinnaatitaaneq, qinersisinnaatitaaneq il.il.

Inuiaqatigiinni nunarsuamiooqataangaluttuinnartumi, siunissamilu Kalaallit Nunaat nunarsuarmut aallartitaqarnissamik soqutiginnikkaluttuinnarnerata, pissutissaqarluartilerpaa suliartortillugit aallartitat taakkulu ilaqutaat inatsisitigut attuumassuteqarnissaat kiisalu assigiimmik periarfissaqarnissaat kalaallinut danskinullu allanut naleqqiullugu. Maluginiarparput, siunnersuutip ilusaata atugarissaarnermik innarliissanngimmat, allannguat una inunnut eqimattanut amerlanngitsunut, Namminersorlutik Oqartussanit aallartitanuinaq, atuuttussaammat. Iluarisimaarparput, Kalaallit Nunaanni innuttaassusillit



takornarissanut sanillersuunneqarunnaarnissaat, taamaattorli Kalaallit Nunaanni pisinnaatitaaffitik atugarissaarnermilu periarfissat atuinnaarsinnaagaat. Tassunga ilutigalugu iluarisimaarparput, inatsisit nutaanngorsarneqarnera, tassami inuit suiaaqatigiit aamma ullutsinni aappariittut nalunaarsorneqartarmata, tamannalu siunnersuummi uani akuerineqarluni.

Taamatut oqaaseqarluta, siunnersuut aappassaaniinginnerani ataatsimiititaliamut attuumassuteqartut innersuupparput.